

**Nukissiuutinit ataavartunit innaallagissamik sinneruttumik suliffeqarfinnut pilersuisuusunut pilersuineq tunisisarnerlu pillugit Namminersorlutik Oqartussat nalunaarutaat nr. 21, 9. december 2013-imeersoq (nammineerluni tunisassiornermut nalunaarut)**

Nukissamik pilersuineq pillugu Inatsisartut peqqussutaanni nr. 14-imi, 6. november 1997-imeersumi § 13, imm. 2 aamma § 21 naapertorlugit aalajangersarneqarpoq:

**Kapitali 1**

*Atuuffissaq nassuiaatillu*

§ 1. Nalunaarummi nukissiuutinit ataavartunit (VE-anlæg), suliffeqarfinnit pilersuisuusunit pigineqanngitsunit pilersuineranut aqqusersuutinit ataatsimoorussanut innaallagissiamut sinneruttumut atassusiinissamut akiliisitsisarnermullu akuersissutit maleruagassiuunneqarput.

§ 2. Nalunaarummi pineqartunut ilaatinneqanngillat:

1) Nukissiuutit ataavartut, innaallagissamik pilersuineranut aqqusersuutinit ataatsimoorussanut tunisisarnermut atorneqanngitsut.

2) Nukissiuutit ataavartut, kissamik pilersuisuusut.

*Imm. 2.* Nukissiuutini ataavartuni sananermut, ikkussuineranut attaviliinerimullu teknikkikkut aalajangersakkat akuersissutillu allat suut naammassineqassanersut nalunaarummi maleruagassiuunneqanngilaq, taamaattorli § 10, imm. 1, innaallagissiuutinit attaviliinerimut suliffeqarfiup pilersuisuusup piumasaqaataannut tunngasoq takuuk.

§ 3. Nalunaarummi matumani uku imatut paasineqassapput:

1) Nukissiuutit ataavartut (VE): Nukissiaq, nukissiuutit nutarterisinnaasut atorlugit tunisassiarineqartoq, taakkunungalugu anori, seqineq, mallit, imeq il.il. atorlugu nukissiuutit ilaapput.

2) Nammineerluni tunisassiorloq: Nukissiuutinit ataavartunik piginnittoq

3) Pilersuinermit aqqusersuutit ataatsimoorussat: Illoqarfinni nunaqarfinniluunniit innaallagissamik siaruarerinerimut aqqusersuutit, suliffeqarfimmit pilersuisumiit atuisumut innaallagissamik nuussiviusartut.

4) Suliffeqarfik pilersuisuusooq: Suliffeqarfik pilersuisuusooq, illoqarfinni nunaqarfinniluunniit nammineerluni tunisassiorloq nukissiuutinit ataavartunik ingerlatsisusooq imaluunniit ingerlatsinissamik siunertaqartoq.

**Kapitali 2**

*Qinnuteqartarnek*

§ 4. Nukissiuutinit ataavartunit innaallagissamik pilersuineranut aqqusersuutinit ataatsimoorussanut pilersuinissamut tunisinissamulluunniit qinnuteqaat suliffeqarfimmut pilersuisuusumut tunniunneqassaaq. Qinnuteqaatip imarissavai:

- 1) Qinnuteqartup aqqa najugaalu imaluunniit suliffeqarfiup aqqa, najugaa CVR/GER normua attaveqarfissanullu paasissutissat.
- 2) Nukissiuutinut ataavartunut qinnuteqaatigisanut nassuiaat, kiisalu paasissutissat allattorsimaffiat tunisassianullu nassuiaatit attuumassuteqartut.
- 3) Nukissiuutit ataavartut inissiffissaattut pilersaarutigineqartunut nalunaarsuutit.

§ 5. Suliffeqarfik pilersuisuusoq nukissiuutit ataavartut § 6-imi aamma § 7-imi taaneqartunik nalinginnaasumik tunisassiornissamut piginnaaneqartut suliffeqarfimmut pilersuisuusumut innaallagissamik pilersuisinnaanersut tunisisinnaanersullu aalajangiissaaq. Nukissiuutit ataavartut, § 8, imm. 1, nr. 1 – 3-mi piginnaasassatut nalinginnaasutut taaneqartut sinnerlugit piginnaasaqartut § 8 naapertorlugu suliarineqassapput.

§ 6. Nukissiuutinut ataavartunut, nalinginnaasumik 6 kW-t sinnerlugit inoqutigiinnut ataatsinut imaluunniit suliffeqarfimmut pilersuisinnaasunut, imaluunniit 6 kW-t sinnerlugit inissiamut suliffeqarfimmulluunniit 100 m<sup>2</sup>-nik angissusilimmut pilersuisinnaasunut suliffeqarfiup pilersuisuusup nammineerluni tunisassiorloq suliffeqarfimmut pilersuisuusumut innaallagissamik pilersuinissamut tunisinissamullu akuersissuteqarfigisussaavaa, tamatumani eqqarsaatigisassat annertuut, matuma kinguliani taaneqartut peqquataallutik itigartitsinissaq tunngavissaqarsimangippat:

- 1) Nukissiuutit ataavartut pilersuinerup qularnaassusissaanut sunniuteqarnerluppata, soorlu nukissiuutit najukkami pilersuinermi iluarsinissamut ajornartorsiortitsippata.
- 2) Nukissiuutinik ataavartunik attaviliinissaq suliffeqarfiup pilersuisuusup nuussinissamut pisinnaasaq pisariaqartinneqartoq naammassiniarlugu ataatsimoortumik pilersuinermut aqqusersuutinik alliliinissaanik sakkortunerulersitsinissaanilluunniit pisariaqartitsiviuppat.
- 3) Qinnuteqartoq suliffeqarfimmut pilersuisuusumut akilerneqanngitsunik akiitsoqarpat.
- 4) Nukissiuutit ataavartut najukkami pilersuinermi aningaasaqarnermut annertuumik sunniuteqarnerlussappata, soorlu nukissiuutit najukkami maannakkut innaallagissamut tunisisarnermut aammalu suliffeqarfiup pilersuisuusup tunisassiorsinnaaneranut naleqqiullugu illoqarfimmi nunaqarfimmiluunniit pilersuinermut aningaasaqarnermut annertuumik ajorseriartitsissappata.

*Imm. 2.* Imm. 1, nr. 1-4-mi eqqarsaatigisassat annertuut saniatigut pissutissaqartoqarpat, suliffeqarfik pilersuisuusoq itigartitsininaavoq.

*Imm. 3.* § 6-imi pissutsit nassuiarneqartut arlaat qinnuteqaammik itigartitsinermut tunngaviusimanersaq pillugu suliffeqarfiup pilersuisuusup qinnuteqartoq nalunaarfigisavaa.

§ 7. Nukissiuutinut ataavartunut, nalinginnaasumik 6kW-t sinnerlugit inoqutigiinnut ataatsinut imaluunniit suliffeqarfimmut pilersuisinnaasunut, imaluunniit 6 kW-t sinnerlugit inissiamut suliffeqarfimmulluunniit 100 m<sup>2</sup>-nik angissusilimmut pilersuisinnaasunut suliffeqarfiup pilersuisuusup nammineerluni tunisassiorloq suliffeqarfimmut pilersuisuusumut innaallagissamik pilersuinissamut tunisinissamullu akuersissuteqarfigisinnaavaa, tamatumani eqqarsaatigisassat annertuut, matuma kinguliani taaneqartut peqquataallutik itigartitsinissaq tunngavissaqanngippat:

- 1) Nukissiuutit ataavartut pilersuinerup isumannaassusissaanut sunniuteqarnerluppata, soorlu nukissiuutit najukkami pilersuinermi iluarsinissamat ajornartorsiortitsippata.
- 2) Nukissiuutinik ataavartunik attaviliinissaq suliffeqarfiup pilersuisuusup nuussinissamat pisinnaasaq pisariaqartinneqartoq naammassiniarlugu ataatsimoortumik pilersuinermut aqqusersuutinik alliliinissaanik sakkortunerulersitsinissaanilluunniit pisariaqartitsiviuppat.
- 3) Qinnuteqartoq suliffeqarfimmut pilersuisuusumut akilerneqanngitsunik akiitsoqarpat.
- 4) Nukissiuutit ataavartut najukkami pilersuinermi aningaasaqarnermut annertuumik sunniuteqarnerlussappata, soorlu nukissiuutit najukkami maanna atuinerusumut aammalu suliffeqarfiup pilersuisuusup tunisassiorsinnaaneranut naleqqiullugu illoqarfimmi nunaqarfimmiluunniit pilersuinermut aningaasaqarnermut annertuumik ajorseriartitsissappata.  
*Imm. 2.* Imm. 1, nr. 1-4-mi eqqarsaatigisassat annertuut saniatigut pissutissaqartoqarpat, suliffeqarfik pilersuisuusooq itigartitsisinnaavoq.  
*Imm. 3.* § 7-imi pissutsit nassuiarneqartut arlaat qinnuteqaammik itigartitsinermut tungaviusimanersoq pillugu suliffeqarfiup pilersuisuusup qinnuteqartoq nalunaarfigissavaa.

**§ 8.** Nukissiuutip ataavartup nalinginnaasumik piginnaaneqartup innaallagissiaanik sinneruttumik suliffeqarfimmut pilersuisuusumut pilersuinissamat tunisinissamullu Naalakkersuisut akuersissuteqarsinnaapput, uku qaangerneqarpata:

- 1) Seqernup qinngornerinik innaallagissiuutini aamma erngup nukinganik innaallagissiuutini 50 kW.
- 2) Anorisaatini 25 kW.
- 3) Nukissiuutini ataavartuni nr. 1-imi imaluunniit 2-mi taaneqanngitsuni 11 kW.

**§ 9.** Akuersissummut atuuttumut, §§ 4-7 naapertorlugit suliarineqarsimasumut naleqqiullugu annertuumik allannguuteqartoqarsimappat, suliffeqarfik pilersuisuusooq akuersissummik allanngortitsinissamat atorunnaarsitsinissamulluunniit periarfissaqarpoq. Allannguutit annertuut tassaasinnaapput, najukkami innallagissamik pilersuinerup uulia atorlugu innaallagissiornermiit erngup nukinga atorlugu innaallagissiornermut allanngortitsineq imaluunniit najukkami pilersuinermut aningaasaqarnerup annertuumik allannguuteqarnera.

*Imm. 2.* Suliffeqarfiup pilersuisuusup allannguutit imaluunniit akuersissutip atorunnaarsinneqarnissaa pillugu atuutsitsisoqalernissaa sioqqullugu sivikinnerpaamik qaammatinik arfinilinnik sioqqutsilluni nammineerluni tunisassiorortoq nalunaarfigissavaa.

### **Kapitali 3**

#### *Akuersissutit akuersissuteqarnermullu piunasaqaatit*

**§ 10.** Suliffeqarfik pilersuisuusooq nukissiuutit ataavartut pilersuinermut aqqusersuutinut ataatsimoorussanut attavilerneqarnissanut akuersissuteqarnissamat piunasaqaatinik aalajangersaasinnaavoq. Piunasaqaatit tassaasinnaapput:

- 1) Nukissiuutininut ataavartununut attaviliineq qanoq suliarineqassanersoq.
- 2) Nukissiuutininut ataavartununut atasumik innaallagissamat uuttuummik ikkussisoqartussaasoq.

3) Innaallagissap qamittoornerani, innaallagissap sakkortussusissaata ajoquteqarnerani il.il. suliffeqarfiup pilersuisuusup sulisuisa tikissinnaasaanik qamittaasiisoqassasoq.

*Imm. 2.* Innaallagissamut pilersuisutaasumut akiliisoqassanngitsoq suliffeqarfik pilersuisuusup aalajangiisnaavoq, matumani uku atorneqarpata:

- 1) Atortoq misileraataasoq imaluunniit takusassiaasoq.
- 2) Nukissiuutit ataavartut sumiiffimmi pingaartumik nukissiuutit ataavartut atorlugit, soorlu erngup nukinga atorlugu, pilersuiffiusumut inissinneqarsimappata.

#### **Kapitali 4**

*Innaallagissamut suliffeqarfimmu pilersuisuusumut tunineqartumut akiligassat naatsorsorneqartarneri naatsorsuinernullu akit*

§ 11. Innaallagissamut tunineqartumut akiligassanik naatsorsuisoqartassappat, § 10, imm. 2 naapertorlugu innaallagissamut uuttuusiiisoqassaaq, innaallagissamik innaallagissamut aqquersuutitut ataatsimoorussanut tunineqartumik uuttuineranut atorneqartussamik. Innaallagissamut akiligassat akiligassanik naatsorsuisarnermut akit, § 12 naapertorlugu aalajangersarneqartut malillugit naatsorsorneqassapput.

*Imm. 2.* Suliffeqarfiup pilersuisuusup tuniniaanermut pilersuinernullu piumasaqaatini akiligassat qanoq iliorluni naatsorsorneqartarnissaannut aalajangersakkanik sukumiisunik aalajangersaasinaavoq, tassungalu ilaavoq innaallagissamut tunineqartumut akiligassanut naatsorsukkat atuisup innaallagissamut akiligassanut, aammalu qanoq akulikitsigisumik naatsorsorneqartarneranut naleqqiullugu naatsorsorneqartarnera.

§ 12. Suliffeqarfiup pilersuisuusup VE atorlugu innaallagissiamut akit, suliffeqarfiup akinut allattuiiffianut assigisaanulluunniit aalajangersassavai. Suliffeqarfiup akit pilersuisuusup periaatsit marluusut, nalunaarummut ilanngussaq 1-imi aalajangersarneqarsimasut aappaa malillugu aalajangersartussaavai.

#### **Kapitali 5**

*Akuersissutinik atuutsitsineq*

§ 13. Nammineerluni tunisassiornermi §§ 5-8 naapertorlugu akuersissummik, aammalu piumasaqaatinik akuersissummi aalajangersarneqarsimasunik sumiginnaasoqarnerani, suliffeqarfik pilersuisuusup pissutsinik aaqiinnissamik nammineerluni tunisassiorlumut peqqusisinaavoq. Suliffeqarfik pilersuisuusup nammineerluni tunisassiorlumut pissutsinik aaqiisinaanissaanut piffissamik naammaginartumik sivisussusilimmik aalajangersaassaaq. Piffissaliussatut aalajangersarneqartup iluani nammineerluni tunisassiorlumut pissutsit iluarsisimangippagit, suliffeqarfiup pilersuisuusup akuersissut utertissinaavaa atortullu attaveersinnaallugit.

*Imm. 2.* Suliffeqarfiup pilersuisuusup sumiginnaasoqarnerani peqqussutai, suliffeqarfiup pilersuisuusup tuniniaanermut pilersuinernullu piumasaqaataani sukkulluunniit atuuttuni aalajangersarneqartut aamma atorneqassapput.

*Imm. 3.* Pilersuinerup isumannaassusiani eqqarsaatigisassani pingaarutilinni pisariaqartinneqarpat, imaluunniit akuersissummi piunasaqaatinik annertuumik unioqqutitsisoqarpat, suliffeqarfiup pilersuisuusup nammineerluni nukissiuutit ataavartut attaveersinnaavai, erninnaartumillu akuersissut utertissinnaallugu.

## **Kapitali 6**

### *Suliffeqarfiit pilersuisuusut akigititaat*

§ 14. Suliffeqarfiit pilersuisuusut qinnuteqaammik suliaqarnermut akinik aalajangersaasinnaapput. Suliffeqarfiit pilersuisuusut akigititaanni suliffeqarfiup pilersuisuusup tuniniaanermut pilersuinernullu piunasaqaatai allassimassapput.

*Imm. 2.* Suliffeqarfik pilersuisuusoq innaallagissamut uuttuummik, nammineerluni tunisassiornermi innaallagissiamik sinneruttumik uuttuineranut atorneqartussamik ikkussineranut akinik aalajangersaassanngilaq.

## **Kapitali 7**

### *Maalaaruteqarnissamut aalajangersakkat*

§ 15. Nalunaarut manna naapertorlugu suliffeqarfiit pilersuisuusut aalajangiineri peqqussutaallu pillugit maalaarutit Naalakkersuisunut tunniunneqarsinnaapput.

*Imm. 2.* Naalakkersuisunut maalaarut atuuttussanngortitsineramik kinguneqassanngilaq.

*Imm. 3.* Maalaarutit tunngavilersugaassapput, aammalu aalajangiinerup maalaarutigineqartup assilineranik ilallugit Attaveqarnermut Pinngortitamullu Naalakkersuisoqarfimmut nassiunneqassallutik.

## **Kapitali 8**

### *Atuutsitsilerneranut aalajangersakkat*

§ 16. Nalunaarut 1. januar 2014-imi atuutilerpoq.

*Namminersorlutik Oqartussat, ulloq 9. december 2013*



Kim Kielsen



Søren Stach Nielsen